

Месяца сентября в 12-й день
Мученика Алексия Елнатского

На велицей вечерни

На Господи, воззвах: стихиры на 8, глас 8.

Подобен: О, преславнаго чудесе:

О, преславнаго чудесе! Во дни гонений лютых на Церковь Русскую/ явился земли нашей теплый заступник,/ блаженный и богомудрый Алексий,/ иже земнаго пристанища отвержеся,/ во еже водворитися в чертозах Небесных./ Темже к нему притекающие исцеления многоразличная приемлют/ и разрешение нуждных обстояний,/ творяще летнюю память его.

О, блаженне Алексие!/ Яко доблий воин Христов,/ отложив мира пристрастие/ и суетныя обычаи того презрев,/ брачныя узы небрегл еси,/ во еже душу свою уневестити Господеви/ и чистую представить,/ яко пресветлую свещу, на свещнице церковнем сияюще./ Поминай нас, творящих память твою.

О, подвигов твоих, блаженне!/ О, мужества твоего и светлости!/ Како изшел еси на брань с князем мира сего?/ Како не убоялся еси служителей свирепейших?/ Како обличил еси люди беззаконныя?/ Како глад и хлад и наготу терпя,/ и в скорбех, о Алексие, благодушествуя,/ вся возмогл еси о укрепившем тя Господе?/ Того моли спастися душам нашим.

Глас 5:

Премудре и богоблаженне Алексие!/ Искус послушания монашескаго прошед,/ на сугубое служение в мир изшел еси,/ идеже власть и славу от руки лукаваго миродержителя тьмы века сего отвергл еси,/ во еже не пременитися нраву твоему тленных ради/ и сохранитися в чистоте души твоей./ Ныне же, в чертозах Небесных пребывая,/ моли спастися душам нашим.

Богомудре Алексие,/ многомятежный мир оставив,/ во дни жития твоего вельми потрудился еси/ и Небеснаго Царствия достигл еси,/ идеже ныне пребываеши,/ Христа непрестанно славословя./ Егоже моли усердно, премудре,/ даровати душам нашим велию милость.

Адаманте твердый, непреклонный столпе,/ миру чужд быв, сущих в нем не отчуждался еси/ и, к покаянию люди призывая,/ жалостию сердца о них болезновал еси,/ безумие же богоборцев мудростию Христовою обличая,/ страждущих и крова лишенных утешал еси./ Темже и нас не остави, блаженне,/ но к любви Небесней сердца наша управи.

Слава, глас тойже:

Приидите, православнии людие,/ припадем к раце мощей блаженнаго Алексия,/ заступника страждущих и обидимых,/ подает бо помощь скорую и всемогущую,/ недужных врачуя, болящих исцеляя,/ в скорбех сущих утешая,/ всех же верных назидая и глаголя:/ О, чада возлюбленная!/ Вскую любите суету и ищите лжи?/ Что всуе мятетесь?/ Последуйте мне, якоже аз Христу,/ да водворитесь в Чертозах радости нескончаемья/ и лица ваша во век не постыдятся.

И ныне, праздника.

Вход. Прокимен дне. И чтения три преподобническая.

На литии стихиры, глас 1:

Днесь радуются верных собори,/ во псалмех и песнех Господеви поюще,/ и, обстояще раку угодника Христова,/ блаженного Алексия, глаголют:/ сей и по смерти, яко жив сый,/ прият от Бога дар недуги телесныя исцеляти/ и ко спасению верныя наставляти,/ град же свой от всякия напасти избавляти/ и молитися, во еже спастися душам нашим.

Днесь ликует обитель Введенская,/ приемлющи, яко бисер многоценный,/ мощи богоблаженного Алексия./ Той бо, яко светильник возженный,/ показывает нам путь во обители Небесныя,/ имже ко спасению наставляеми,/ славим Бога, дивнаго во святых Своих.

Веру твердую имея, преблаженне Алексие,/ благодатию Божиею добродетель к добродетели прилагал еси:/ терпению незлобие, послушанию смирение,/ безстрастием же и любовью, яко златом, венчався,/ храм духовен себе самага наздал еси,/ в немже выну принося Богу жертву хваления,/ яко Ангел на земли пожил еси./ Ныне же, с Небесными чинми совокупляясь,/ поеши Богу песнь победную.

Слава, глас 6:

Даром пророчества украшен,/ досточудне Алексие,/ Церкви Русстей гонимей быти предрекл еси/ и давидским гласом вопиял еси:/ вскую шаташася языцы/ и людие поучишася тщетным?/ Олтари Твоя, Господи, раскопаша/ и священники Твоя избиша./ Но не постави им греха сего,/ не ведут бо, беззаконнии,/ яко неправедная содевают.

И ныне, праздника.

На стиховне стихиры, глас 2.

Подобен: Егда от Древа:

Егда найде на тя Божественный Дух,/ Алексие чудне,/ тогда мира мятеж и суетныя обычаи того отринул еси/ и, будущия жизни вождевая,/ духом же к Богу пламенея,/ о плоти всеконечне небрегл еси./ Темже, в вечныя обители водворився/ и дивным небожителем совокупився,/ поминай нас, любовью чтущих тя,/ в теплых молитвах ко Господу.

Стих: Пришлец аз есмь на земли,/ не скрый от мене заповеди Твоя.

Егда найде на землю Русскую безбожная злоба,/ тогда мира вся красная отвергл еси, блаженне Алексие,/ и, одежды тленныя обнажився,/ подвиг юродства приял еси,/ безумна же себе творя,/ безумие неверных всеконечне обличал еси, глаголя:/ почто, людие, веру отеческую забыша?/ Почто заповеди Божия попраша?/ Почто скверным богоборцем выю подклониша?/ Темже, святе, молися/ улучшить нам время на покаяние.

Стих: Прилепихся свидением Твоим, Господи,/ не посрами мене.

Егда, преблаженне Алексие, проречений твоих ради и твердости/ на раскаленные плинфы поставлен был еси,/ тогда, древним мучеником подобясь,/ тленным огнем не опалился еси,/ но небоязненно Христа пред мучители проповедал еси,/ тепле о них моляся./ Кончину же свою дивно предуведев,/ от многомятежия сего, радуясь, преселился еси,/ правды Божия показуя торжество.

Слава, глас 8:

Новый Алексей и человек Божий явился еси,/ твердый в скорбных, непреклонен в болезненных,/ Симону в терпении и Василию в безстрашии подражая,/ любви Божия силу являя,/ очи, суетою омраченныя, отверзая,/ сильныя мира сего, яко расточенныя, вмения,/ и грядущая, яко настоящая, прозревая./ Темже моли, всеблаженне,/ улучшить нам Небесныя кровы.

И ныне, праздника.

Тропарь, глас 1:

Рачением божественным уязвився от юности,/ юродством вольным мудрость века сего посрамил еси,/ премудрости Божией в тайных поучаяся,/ предзрел еси, яко настоящая, грядущая,/ не словом, но житием образ быв добродетели,/ страдальчески течение скончал еси,/ темже Христос сугуба венца сподоби тя, блаженне Алексие,/ Егоже моли спастися душам нашим.

На утрени

По 1-м стихословии седален, глас 7:

Яко бездомок странствуя и не имый где главы подклонити,/ озлобления и скорби земныя претерпел еси, блаженне,/ ныне же, во отечествии Небеснем водворяясь,/ нас, в молитве тебе призывающих,/ от бед и напастей многообразных избави.

Слава, и ныне, праздника.

По 2-м стихословии седален, глас 2:

Умом и душою украшен,/ многострадальным житием просиял еси, преблаженне,/ темже и мы, в памяти твоей благодатными лучами просвещешся, молимся ти прилежно:/ воздохни о нас ко Господу/ и покрый теплым твоим предстательством.

Слава, и ныне, праздника.

Величание:

Величаем тя,/ блаженный мучениче Алексие,/ и чтим святую память твою,/ ты бо молиши за нас/ Христа Бога нашего.

Псалом избранный: Терпя потерпех Господа:

По полиелеи седален, глас 1:

Твое, блаженне, предстательство стяжахом,/ людие скорбнии и отчаяннии,/ наипаче же гонимии от миродержителей тьмы века сего,/ ты бо и заблуждшия не оставляеши/ и отчаянныя надеждою воспламеняеши./ Темже, ныне память твою совершающе, припадаем и вопием:/ расточи греховныя соблазны,/ иссуши мутныя потоки безбожия/ и умоли Господа славы,/ да не постыдимся, егда приидет судити всяческая.

Слава, и ныне, праздника.

Степенна, 1-й антифон 4-го гласа. Прокимен, глас 4: Возвеселится праведник о Господе/ и уповает на Него. Стих: Услыши, Боже, глас мой, внегда молити ми ся к Тебе. Евангелие от Матфея, зачало 43.

По 50-м псалме стихира, глас 6:

Мира сего красная возненавидел еси,/ плоть духу поработив,/ и, телесныя любви удалився,/ юродства подвиг тяжкий подъял еси/ и, яко златыми крилами,/ на Небеса возлетел еси,/ яже есть молитва теплая и смирение

нелицемерное,/ темже, блаженне Алексие,/ не забуди нас, припадающих мощем твоим,/ и совершающих святую память твою.

Канон, глас 8.

Песнь 1

Ирмос: *Колесницегонителя фараоня погрузи,/ чудотворяй иногда/ Моисейский жезл, крестообразно поразив/ и разделив море,/ Израиля же беглеца, пешеходца спасе,/ песнь Богови воспевающа.*

Припев: Святый мучениче Алексие, моли Бога о нас.

Слове Божий и Агнче Непорочный, даруй ми слово, во еже восхвалити угодника Твоего, иже предлежит zde телом, духом же Ангелом сликовствует присно.

О Господе помощник нам буди, блаженне, изымая нас скорбей и болезней, соблазнов же, нестроений и бед, желания сердец наших во благих исполняя.

Египетския котлы благоденствия презрев и миру кичливому посмеявша, Алексие мудре, реки мутных вод житейских неврежденно прешел еси, Богу победную песнь воспевая.

Богородичен: Тлитель убо древле и братоубийца явися Каин, прежде от Бога прокляся. Что же сотворю аз, вседёрзый, душу свою люте погубивый! Но даждь ми, Владычице, прежде конца покаяние.

Песнь 3

Ирмос: *Небеснаго круга Верхотворче, Господи,/ и Церкви Зиждителю,/ Ты мене утверди в любви Твоей,/ желаний краю, верных утверждение,/ Едине Человеколюбче.*

Наготу и хлад терпя, и страх мучителей любовию превозмогая, судьбы Божия людем предвозвестил еси, блаженне, и путь правый показал еси.

От младенства смиренномудрие стяжав, любовию Божию обогатился еси, умом же горе возносяся, лице Господне чисте зрел еси.

Чада твоя есмы, святче Божий, не остави нас сирых, обаче на помощь к нам притецы и научи добродетельми Господа славити.

Богородичен: Крепость ведый матерния Твоя молитвы к Сыну и Того многое благоутробие, к Тебе приступаю, Пречистая, страхом одержимь и любовию понуждаемь.

Седален, глас 6:

Молитесь Богу, непрестанно призывал еси, святе, молитесь,/ и убойтесь гнева Его./ Темже не обленимся, православнии,/ да не искусим паки долготерпения Божия,/ но воззовем теплою верою и неленостною молитвою:/ согрешихом, беззаконновахом, неправдовахом, Господи,/ не остави нас, во унынии сущих,/ но спаси нас Алексия праведнаго мольбами.

Слава, и ныне, праздника.

Песнь 4

Ирмос: *Услышах, Господи,/ смотрения Твоего таинство,/ разумех дела Твоя/ и прославих Твое Божество.*

Точию изыде слава подвиг твоих, блаженне, врази Господни возсташа погубити тя, духа бо Христова в тебе не терпящу и злобою зело распаляхуся.

Иоанна, возлюбленного ученика Спасова, слышав, глаголюща, аще кто любит мир, несть любви Отчи в нем: мир и леть его возненавидел еси, ярем Христов возложь на ся, радуяся.

Сродство и имение Христа ради оставил еси, святе Алексие, и телесная одеяния презрел еси. Дажь и нам сицевое небрежение о преходящих и суетных.

Богородичен: Адам убо преступи едину заповедь и изгнанию подпаде: како же восплачу аз прегрешений моих бездну? Обаче к Тебе, о Мати Божия, молитвы простираю: моли, Всечистая, Сына Твоего и Бога, помиловаться души моей.

Песнь 5

Ирмос: *Утреннююще, вопием Ти:/ Господи, спаси ны,/ Ты бо еси Бог наш,/ разве Тебе, иного не вемы.*

Земленный и перстный имею ум, блаженне, просвети мя к Небесным и вечным, тебе бо стяжах тепла молитвенника.

Осмеяние и ругание пища тебе бысть, блаженне, питание же сладкое богомыслие и смиренномудрие, глагол же пророческий, яко одежда, вменися.

Власть беззаконную и богоборную обличая, люди поучал еси имения тленная и непостоянная презирати, Небесная же сокровища добродетелей стяжати.

Богородичен: Исаву поревновав лютому во чревобесии, душу и тело осквернив невоздержанием и нечистотою, к Тебе, о Дево, прибегаю, заступи мя и избави вечных мук.

Песнь 6

Ирмос: *Ризу мне подаждь светлу,/ одейся светом, яко ризою,/ Многомилостиве Христе Боже наш.*

Чуден в терпении и во уповании непосрамлен, Единого Царя Христа воин был еси, блаженне, малодушныя утверждая во исповедании дерзновеннем.

Риз совлеклся еси, святе Алексие, взывая: довлеет ми риза крещения, и наготу и хлад превозмогл еси, побеждая естества чин.

Уста непрестанно движа в молитве, без неяже никакоже возможет человек понести ни единыя тяготы Христа ради, венцем на Небесех увязлся еси, блаженне.

Богородичен: Сокрушаема множеством прегрешений и во отчаянии суща, не остави мя, Владычице, но возведи крепкою рукою Твоею.

Кондак, глас 6:

Христовою любовью распалаемь,/ не убоялся еси вещественного огня,/ терпением твоим врага посрамив,/ сердце мучителево уязвил еси кроткими твоими глаголы,/ провещая гнев Божий, праведно грядущий нань,/ и о прощении всех, блаженне, моляся./ Темже тебе припадаем и тепле вопием:/ не премолчи за ны ко Господу.

Икос:

Проповедует весь Елнатская труды и подвиги твоя, богомудре Алексие,/ еже ко Господу рачение теплое,/ о людех болезнование сердечное,/ моление непрестанное, слез источницы,/ риз совлечение, и пищи лишение,/ и всякаго

мирскаго пристрастия отложение,/ еще же ругания и безчестия от злых человек,/ в темнице заключение и нуждную смерть./ Но вся сия претерпел еси, радуясь,/ Симона блаженного стопам последуя,/ с нимже ныне в дому Отчем водворяешься, Алексие, угодниче Христов./ Темже тебе припадаем и тепле вопием:/ не премолчи за ны ко Господу.

Песнь 7

Ирмос: *Отроцы еврейстии в пеци/ попраша пламень дерзновенно/ и на росу огнь преложиша, вопиюще:/ благословен еси, Господи Боже, во веки.*

Суету, яко прах, от ногу твоею отрясл еси, никакоже той поработився, власть суетную и невесту земную отринув, чисте душу твою Христови представил еси.

Разумение писаний и книжныя мудрости делом показуя, дара пророчества сподобился еси и, сие гадательно людем известуя, до конца в подвиге неколебимь пребыл еси.

Прежде юродства подвигом затвора крепко подвизаяся и правило веры непостыдное являя, Богу твоему рабство не пременял еси на свободу суетную сынов века сего.

Богородичен: Омрачихся окаянный множеством безмерных зол, изменихся душевным оком и умом, погубих первую доброту и чужд бых сыновства Владычня. Ты же, Пречистая Дево, света Твоего зарями просвети мя.

Песнь 8

Ирмос: *Богоглаголивии отроцы в пеци,/ со огнем пламень попирающе, пояху:/ благословите, дела Господня, Господа.*

Воззови о нас ко Господу гласом крепким, блаженне Алексие, якоже Моисей о людех своих в пустыни, да избавимся от власти лютаго миродержца.

Имже образом желает елень на источники водныя, сице и ты, всегда подвизаяся, желал еси единого на потребу, вся заповеди в мире соблюдая и сердце молитвою присно согревая.

Аще и отшел еси во обители Небесныя, обаче земная обиталища, чтущая тя, не оставил еси, темже благодарне ублажаешься верных гласы.

Любве стяжания, смиренномудрия взыскания и веры велия сподоби нас, подвиги жития твоего чтущих, Алексие блаженне.

Богородичен: Егда дух мой имать с плотию разлучитися, Владычице, тогда не презри мене, обеты поправшаго, но избави дивно козней лютаго миродержца и губителя.

Песнь 9

Ирмос: *Устрашися всяк слух/ неизреченна Божия снизхождения,/ яко Вышний волею сниде даже и до плоти,/ от Девическаго чрева быв Человек./ Темже Пречистую Богородицу, вернии, величаем.*

Кто не удивится терпению твоему, блаженне? Ты бо, греховнаго рабства отрицайся и разрешился плоти желая, раскаленные плинфы небрегл еси.

Славою божественною облистаемь, предстательствуеши к Богу за чтущия тя, Алексие блаженне, темже молим тя: молитвою твоею напасти отжени и коварство духов злобы разори.

И раны врачуеши, и молитвы слышиши, и на помощь к нам, призывающим тя, скоро прибегаеши, блаже, заступниче верный.

Богородичен: Езеро огненное уготовах себе житием блудным и скверным, Владычице, совестное жжение прежде геены нестерпимо ми есть, темже молюся: не остави раба Твоего, праведнаго Алексия мольбами.

Светилен:

Свет Христов осия тя, Алексие чудне, совлеклся бо еси ветхаго человека и явился еси нов, духом горя. И ныне в лице новомученик предстоиши Святей Троице и землю нашу просвещаеши чудесы.

Слава, и ныне, праздника.

На хвалитех стихиры, глас 5.

Подобен: Радуйся:

Радуйся, богомудре Алексие,/ яко Духа Святаго жилище себе соделав,/ земных вещей всеконечне совлеклся еси/ и, юрод быв о Христе,/ подвигом и терпением Царствия Небеснаго достигл еси,/ хранение же устом своим положив,/ чист помысл стяжал еси./ Ныне же со Ангелы ликуеши,/ человеце Божий и небошественный.

Радуйся, преблаженне Алексие,/ яко измлада чистаго жития возжелав,/ пламень похотный погасил еси,/ ризою юродства премудрость сокрыв/ и непрестанною молитвою тайнолепно Богу послужив,/ благодать Духа Святаго стяжал еси./ Темже, яко имея дерзновение ко Господу,/ Тому непрестанно молися/ о поющих и славящих тя.

Радуйся, богоблаженне Алексие,/ ты бо, мудрость века сего презрев,/ любовь Господнею разжеглся еси/ и, яко хвастие, помыслы гнусныя попалил еси/ и, вся узы временнаго жития расторг,/ Богу теплыя молитвы возносил еси,/ во еже стяжати Того Единого в сердце твоём,/ Егоже благодать приим,/ не остави молитвенник твоих во странствии сущих.

Слава, глас 8:

Что ты наречем, о Алексие чудне?/ Приим бо крест, последовал еси Христу/ и, мудрейшим юродством врага победив,/ потоки слез того потопил еси/ и, богатство некрадомо в души нося,/ Христово учение делом исполнил еси./ И ныне, на Небесех ликуя,/ моли Милостиваго Бога/ спастися душам нашим.

И ныне, праздника.

На Литургии

Блаженны от канона песни 3-я и 6-я. Прокимен, глас 7: Возвеселится праведник о Господе/ и уповает на Него. Стих: Услыши, Боже, глас мой, внегда молити ми ся к Тебе. Апостол к Галатам, зачало 113. Аллилуиа, глас 6: Блажен муж, бояйся Господа, в заповедех Его восхощет зело. Стих: Сильно на земли будет семя его. Евангелие от Луки, зачало 24. Причастен: В память вечную будет праведник, от слуха зла не убоится.

Молитва

О, угодниче и заступниче наш, преблаженне Алексие, достойный наследниче Небеснаго Царствия! Припадающе раце мощей твоих, усердно просим тя: помолися, отче, да исправятся стопы наша по словеси Господню к

деланию заповедей Его и да не возобладает родом нашим от безбожников
всеянное беззаконие душетленное, но да узрим на Святей Руси утверждение
веры Православныя!

О, святче Божий, утаивый истинную премудрость и обличивый мудрость
сынов века сего! Испроси нам у Господа дух смирения, кротости и любви залог,
в молитвах несумненную веру, в покаянии твердую надежду, в служении
ближним крепость, в болезнях скорое исцеление, всего же жития нашего
обновление, яко да, убожающе тя, достигнем христианския кончины
непостыдны и мирны, и наследим Царствие Небесное, идеже ты, в вечней славе
пребывая со всеми святыми, прославляеши Отца и Сына и Святаго Духа.
Аминь.